



臣朱壽朋敬編

臣沈彭年恭校

五月庚戌朔諭刑部代奏主事曾克相應詔陳言一摺民間樹藝之事五穀而外惟茶與桑實爲自然之利果能廣爲勸諭種植得宜亦足以厚民生而裨日用著各該省督撫謹遵欽定授時通考督飭地方官切實講求茶桑兩種應如何培養採取之法各視地之所宜勸令民間廣爲栽植該地方官如能勸有成效准其奏請獎勵○命全慶以刑部尚書協辦大學士○以載齡爲大學士管理工部事務○辛亥調靈桂爲吏部尚書以恩承爲禮部尚書榮祿爲都察院左都御史○壬子以運賑出力予臬司黎兆棠等升叙有差○癸丑福建提督周志本卒下部從優議卹○諭御史李桂林奏各倉放米往往有棍徒包攬俸票並領分肥請旨嚴禁等語倉務關係綦要豈容匪徒從中漁利致滋弊端著戶部倉場侍郎於各旗領米時仿照甲米章程派員會同各參領督同監放務令各該員依限自領以祛積弊而慎倉儲○甲寅諭翰林院代奏編修吳觀禮條陳近日部院行省營伍弊端請飭變通查禁等語各部院交議事件自應體察情形詳慎議覆豈可就延積壓使書吏得售其奸嗣後在京各衙門凡有交議及應辦事宜該堂官

務當責令承辦之員事必躬親速爲經理毋得假手吏胥致滋流弊凡定稿題奏限以時日以期毋怠毋
荒應如何量予獎懲並著隨時考察秉公辦理各省疆吏侵官藩司曠職以及理刑衙門率結疑獄妄駁
新呈所在多有著各直省督撫力除積習凡用人理財諸事悉責成藩司認真經理不得侵官蔽賢自取
咎戾刑名出入尤關緊要並著責成臬司督飭承審之員分任治獄毋得互相諉卸以致案件積留並隨
時嚴查各屬州縣分別詢報不准再有率結妄駁情該編修所稱上下忙之併征西北路之騾驢皆於
荒政有礙著卽查明嚴行禁止營伍亟宜整頓若如所奏練軍空額將弁匿缺冒餉統領勒提營官夫價
營官攤扣各哨薪糧統領族戚以衣物按名派銷扣餉漁利以及挑補兵丁需索規費戍兵私賣防汛爲
晒鹽地以致積蠹損壞砲石各情尙復成何事體著各該督撫確切查明如有前項情弊卽著從嚴參辦
毋稍徇隱○丙辰以四川重慶瀘州一帶梟匪肅清予知州田秀栗等獎叙有差○丁巳諭御史劉錫金
奏訪明陝西殉難紳民婦女開單懇請旌卹一摺陝西同州府屬之大荔朝邑郃陽等縣於同治元年回
逆變起時該處紳民人等或禦賊被戕或畏辱捐軀均堪憫惻該御史籍隸陝西見聞較確所有單開之
訓導朱溪午等三百八十一名口著該部查明照例分別旌卹並准其自行捐資立祠建坊另片奏請將
保全城寨之生員議卹等語陝西朝邑縣生員雷五堃著譚鍾麟查明奏請卹典該部知道○己未諭榮

祿等奏遵議資遣外來飢民章程請賞銀兩一摺直隸被災較重之保定等府州縣流民前經順天府先行遣令歸籍榮祿等現已將順天直隸之武清等州縣山東之臨清等州縣陝西之蒲城等廳州縣並河南山西兩省在京災民查明情願回籍者一併資遣給與路費等項錢文並分別加給銀兩以爲回耕資本卽著督飭屬員妥爲經理加恩賞銀二萬兩由戶部給發俾資散放餘依議另片奏外城永定等門外粥廠請續賞銀米等語著再行賞給米一千石銀一千五百兩由戶部倉場衙門發交五城以濟窮黎○庚申張佩綸奏竊得雨以來 朝廷益加敬畏 申諭周詳民心大定矣漸乃訛言起則以增兵宿衛也以臣所聞或曰欽天監有封奏矣熒惑在某度主火備火氣也或曰饑民多恐教匪乘之起旣申門禁益鎮以兵備非常也 高深之見諒非市人所能測審如二說臣不謂然夫五行占驗乃近術家宋公一言熒惑退舍子產不信裨竈鄭亦不火理不勝數何常之有且卽以天文言之三垣乃無他祥火星亦仍常道其可懼者惟日有赤色則祇畏已在 聖心心誠畏 天政必法 天修德以禳之可也林清之變外結悍賊內連宦寺非真有邪術可役鬼行厭也今誠得盜賊主名下步軍統領順天府五城密擒之足矣誠得宦寺主名下總管太監密治之足矣若無左證則徒風影持靜以鎮之可也且臣聞之積沴之氣散爲訛言訛言所自起始則天久不雨百姓不無造作以相驚恐漸達於士大夫漸達於 宮禁輾轉附會

乃至不可究詰極其妄誕不經或且張皇妖夢緣飾神言取止徵信人無覺焉妖不自作謠出之叫傳籥之謹 朝廷不應出此臣非不知思患預防與其不防而有萬一不如防之之爲得計也然內存祇畏無事當作有事觀外示鎮定有事當作無事觀今海內晏然而禁兵忽集傳之四遠將謂之何昔年黑蜥則符籙徧於貴家今歲赤祥則馬甲森於複道臣恐中外有以測 朝廷也伏願 皇太后 皇上與王大臣求所以格 天安民者安危禍福誠不在區區屯衛所謂神機營兵卽係年例歇夏亦請 明詔宣示以定人心其在易曰遇雨之吉羣疑亡也降雨自 天釋疑自 上浮言不已臣不敢不以 聞又竇廷奏竊惟德可格 天惟靜可制動不務根本徒事張皇不但不能弭亂且恐以召亂前月以來訛言大興荒唐怪誕不一而足紛紜傳說人心皇皇近聞神機營兵調駐 禁城左右人心更滋疑惑奴才愚昧之見不解鬼神之說占驗之術竊謂聖功王道坦平正直荒唐之言皆不足信果有天變當修德以挽之邪教難保必無嚴查保甲嚴申門禁以防之前曾有 旨嚴保甲矣所謂嚴者不過戶黏一紙而已而良莠之雜處如故也亦有 旨嚴門禁矣所謂嚴者不過無冠不許入無褂不許入而已而閒雜之往來如故也不此之務而別事張皇設有意外之變寇起 禁中城外雖有勁兵緩不濟急豈足恃哉京師五方錯處保甲原不易查而豈可遂聽其不查請 旨飭下步軍統領等衙門督率實力奉行不可虛應故事

禁門理應嚴肅非奏事引 見不當輕入邇來畫稿見堂官送人引 見考試紛紛入 內稽查良難

神武門 蒼震門爲太監及各項匠役所出入尤難稽查無知太監難保不引進閒人 景運門 隆宗

門外各處院宇煩多更難保不容留閒人而各門護軍既未必一律精壯器械又多不堅利且未必足額

設有變故何以禦之請 旨飭下御前大臣軍機大臣內務府大臣前鋒護軍統領迅速查照成例變通

會議章程嚴甲門禁官員非奏事引 見不許輕入各處當差吏役人等及各處太監出入嚴查人數姓

名不許引進閒人容留閒人私住外變必由內引嘉慶癸酉之變亦由太監勾通請 飭下內務府大臣

隨時嚴查各處太監如有跡涉可疑與不循規矩者卽行撥出不可姑留邇來外間訛言紛騰無知太監

未必不互相傳說且恐有藉端妄造以干 天聽者 皇上尙在冲齡豈可聞不經之語尙乞 皇太后

嚴加防察其有言近荒誕者概行禁止不許妄傳以杜奸謀而免紛擾並請 降旨曉諭臣民近因遇災

修省諸求整頓凡調營兵查保甲嚴門禁等事不過因流民衆多隄防盜賊起見原無他意聞欽天監前

上封事外間不知底裏紛紜妄擬如所奏無大關係請將原奏 宣示以釋羣疑神機營兵既調亦不必

遽撤但將密作護衛不須顯張聲勢駭人耳目當此 天心大順雨暘時若天下事已有轉機伏願 皇

太后 皇上益加寅感益加修省益加振作以邀 天眷內外防範既嚴以靜待動一切浮言不必輕聽

縱有災異 修德可以挽回縱有奸謀有備自能無患若因旱災漸弭遂日就怠荒當嚴者不嚴不必信者輕信外露張皇而內疎防備竊恐宦寺因而生事奸宄因而生心名爲弭亂實以召禍天下事將不可問矣欽奉 慈安端裕康慶昭和莊敬皇太后 慈禧端佑康頤昭豫莊誠皇太后懿旨翰林院侍講張佩綸奏請修德持靜以靖浮言國子監司業寶廷奏訛言日起請示鎮定各一摺京師連次得雨深透人心大定外來饑民現已陸續資遣本毋庸作意外之防至禁門理應嚴肅曾諭前鋒統領護軍統領認真整頓復據醇親王面奏神機營兵年例歇夏可派令幫同地方官巡查當經允其所請自四月初五日至二十八日每見日月出入時間有赤色按天文正義內載日月占驗三日內有雨則解逐日觀候存記俱係三四日內或有雨或微風或雲陰不入占等語該衙門照例具奏之事亦無用其張皇若如張佩綸寶廷所奏則民間因此傳聞訛言日興是朝廷整飭紀綱之舉轉爲羣情駭惑之端不可不明白曉諭以安人心而釋羣疑著卽將欽天監原摺單一併宣示至嚴甲門禁章程著御前大臣軍機大臣總管內務大臣前鋒統領護軍統領查照成案妥速會議具奏所有京師內外城保甲事宜著步軍統領等衙門督率司員實力奉行不得虛應故事神武門蒼震門爲太監及各項匠役所出入著總管內務府大臣妥爲約束毋任滋生事端○諭翰林院侍講張佩綸奏河南吏治素劣賑務尤不認真請飭嚴劾貪墨等語山西

河南兩省前已有旨諭令查參辦賑不善之員河南賑務現正喫重其辦理得力者固應量予獎勵以示激勸而其中亦難保無貪劣各員朦混作弊著涂宗瀛嚴密訪查遇有此等不肖官吏卽行從嚴參辦勿稍徇庇○癸亥戶部尚書魁齡因病懇請開缺允之○甲子諭萬青藜等奏六門四鎮及蘆溝橋趙村鮑家莊各粥廠請展限續賞銀米各摺片現在糧價未平近畿各粥廠貧民就食猶多加恩著照所請所有六門四鎮及蘆溝橋粥廠自本月起再展限兩箇月賞給粟米一千四百石並籌撥銀二千兩飭令撙節動用其趙村鮑家莊兩廠著一併再行展限兩箇月仍每月賞米一百二十石以贍窮黎○以景廉爲戶部尚書榮祿爲工部尚書文煜爲都察院左都御史○左宗棠奏臣於三月二十六日欽奉上諭劉典奏請開缺回籍養親並就醫治病一摺據稱現在新疆肅清軍務大定關內防營一時縱難盡裁督臣可以就近兼顧毋須另員照料伊母衰病愈增需人侍奉並自陳病狀請開缺回籍養親治病等語關外軍務告竣一切善後事宜尙須籌畫所有後路防營及轉運各事該大臣是否可以兼顧無須劉典幫辦之處卽著斟酌情形奏明辦理將此諭令知之欽此臣維劉典奉命幫辦陝甘軍務於今三載漢回乂安兵民和輯固已成效可觀凡整軍節餉可以裨益地方及生聚教訓可爲民間久遠計者無不殫誠竭慮匪勉圖之陝甘官紳士民兵勇具有見聞無煩覲縷臣頻年壹志經營關外新疆內顧無虞實賴劉典之

同心裨贊現在新疆軍務雖竣而謀及久長莫如置省開設郡縣事關大局宜慎其始北路鎮迪一道雖粗具規模然自準部夷滅後漢回錯處兵燹之餘遺黎什存一二田疇荒蕪彌望蕭條近時招徠耕墾稍有頭緒然非俟烏魯木齊都統伊犁將軍詳細會籌不能定議入告南路自吐魯番以暨八城久爲安集延逆渠竊踞雖官軍長驅迅掃秋毫無犯回民安堵如常較北路尙爲完善惟議設郡縣則必正經界察腴瘠以定賦役別險夷審衝僻分繁簡以定官制有仿內地成法隨宜損益者有按內地成法應議變通者非俟劉錦棠張曜及各局員隨時察酌會籌不能定議入告千條萬緒創始尤難緘牘往返動需兩月有餘臣雖衰朽餘年仍應暫駐邊關待此議有成乃可回省而關內正議改各營行糧爲坐糧以期撙節而規久遠尤非劉典一手經理難期周妥劉典體質素強惟不耐窮邊寒苦易生疾病每遇冬春卽患喘促氣滿痰嗽暈眩諸證與臣同病而所患尤劇臣遣人省視僂僂呻吟之狀如見如聞而猶力疾治事鉅細躬親晨夕靡間屢次緘稱年已六旬久病之餘精力銳減深以未獲爲國久効馳驅爲憾母年八十有七近聞衰病侵尋時深憂懼詞多苦楚臣雖再四慰留然觀其情狀實有未敢壅於上聞者竊意時近溽暑長途跋涉亦非病軀所宜而劉典經手事宜尙須料量非新秋不能成行合無仰懇 皇仁俯准劉典開缺回籍以便省親養病之處出自 天恩謹據實覆陳伏候 皇太后 皇上聖鑒訓示施行又

奏臣自咸豐十年奉 命從事戎行卽延致素交襄理營務維時司臣營務者道員 予諡貞介王開化及劉典楊昌濬三人道義相正患難與偕實非尋常可比雖異時悲懼離合蹤跡不同而彼此氣誼交孚至今尙堪覆按楊昌濬以餘杭案去官時論異同臣固無庸置喙然觀浙民去思之切亦足見其無負於浙人也茲劉典養親治病實出真忱臣旣蒙 垂詢不能不代懇 恩施開缺回籍而新疆善後事務紛繁一時難於就緒臣旣不能分身兼顧則幫辦軍務仍須速覓替人合無仰懇 天恩特飭前任浙江巡撫臣楊昌濬迅赴蘭州幫辦陝甘軍務出自 聖裁臣因時事相需起見不敢自安緘默是否有當伏乞 聖鑒訓示施行 上諭左宗棠奏覆陳劉典病難速痊親年篤老懇准開缺回籍並請簡員幫辦各摺片通政使司通政使劉典著准其回籍前任浙江巡撫楊昌濬著賞給四品頂戴幫辦甘肅新疆善後事宜劉典著俟楊昌濬馳抵甘肅後再行交卸回籍○予故巡撫勞崇光於廣西建祠列入祀典○乙丑諭前據國子監司業汪鳴鑾奏杭州旗兵強買尋釁招黨持械傷斃鋪夥兇犯潛匿營內等情當經諭令果勒敏等嚴拿案犯定擬具奏茲據奏稱上年十月間有山東德州銷檔旗人鄭聽卽榮福在藍橋地方茶葉鋪強買茶葉該店不允致相爭毆馬甲哈山保等往勸爭打致店夥方正恩等受傷首犯脫逃等語旗兵恃強滋事實屬目無法紀該將軍等平時旣約束不嚴事後又不能將逸犯立時拿獲咎無可辭果勒

敏濟祿均著交部議處仍著分飭勒拿逃犯鄭聽卽榮福務獲歸案嚴訊分別重懲至該營雖無徹夜不
閉情事仍當嚴定營規飭令各營官仿照保甲章程設立門牌稽查奸宄毋任兵丁再滋事端餘著照所
議辦理○諭御史秀文奏請慎拏倉匪以免拖累一摺據稱匪徒攪擾倉務多有挾嫌捏告等情而兩翼
弁兵奉旨查拏動輒白餘人藉端搶掠財物往往誤拏良民並有私刑拷問事情請嗣後查辦倉匪密交
倉場派員訪拏等語匪徒攪擾倉務自宜嚴辦惟必須訪查明確方可搜拏豈容藉端滋擾嗣後步軍統
領衙門務當嚴飭派出弁兵慎密查拏不准有妄拏良民及藉勢騷擾情事至倉場衙門本無緝拏人犯
之責該御史所請著毋庸議○曾國荃奏晉省上年遭此奇荒民不堪命仰蒙 朝廷加意撫恤迭次撥
給漕糧自應迅速轉運早達災區方足以廣 皇仁而拯民命惟南路迤西牲畜盡皆倒斃近日各屬略
沾雨澤阡陌正須翻犁去冬尚有駱駝可僱一交夏令盡行歸廠騾腳無從僱覓小民趨利若鶩非加價
不足以廣招徠惟是運費過鉅各省捐協之欸一時未能猝至本省勸捐已成弩末且上年錢糧業經分
別蠲緩本年上忙亦予蠲免司庫如洗無可騰挪現在節交小滿若不迅籌運費必致糧滯中途無以達
飢民之口因思晉省各項貿易惟平遙祁縣太谷三縣匯兌各莊較為殷實查同治十三年因兵餉不敷
曾經奏借過該商銀二十一萬兩至今尚有七萬餘兩未完該票莊共體時艱屢緩取償洵屬顧全桑梓

茲當運費維艱之際無可設法不得已檄委監掣同知張元鼎前往平遙祁縣太谷三縣會同地方官剴切勸借茲據各票莊共允湊借銀十二萬兩查該票莊各省均有字號若能幫助勸捐或可以廣招徠一俟集有成數即可歸還本屆借款酌給利息一轉移間目下既可稍資運糧今冬明春歸償借款亦不至虛懸無著至於前次奏借未還之銀七萬餘兩議從捐輸項下一併給還以示信於票商據捐輸局司道會詳請奏前來臣查所辦係爲廣籌運費起見官商均以信義相孚移緩就急期於始終不渝尙屬允協下戶部知之○丁卯諭巡視中城御史訥隆阿等奏請將五城飯廠及紳捐各粥廠再行展限各摺片現在糧價尙未平減貧民餬口維艱所有五城十五廠著加恩再展限兩箇月至五城之朝陽閣育嬰堂打磨廠長椿寺關帝廟圓通觀梁家園各粥廠據稱經營不敷仍照舊請領米石等語卽著照所擬辦理○戊辰調萬青藜爲吏部尙書以徐桐爲禮部尙書翁同龢爲都察院左都御史○己巳命董恂充實錄館正總裁○左宗棠奏據統領武威軍平慶涇固道魏光燾稟稱擬由閩軍籌備經費擇就平涼府城空地建修忠義祠專祀武威軍歷次陣亡傷故文武員弁兵勇並附祀平慶涇固各屬隨同官軍戰守傷亡官紳鄉團士庶人等歲時致祭以慰忠魂並由營勇墾熟荒地內劃撥四百畝除完納正額丁糧外餘充香火祭祀之費等情呈請具奏前來臣查軍營陣亡官弁人等有於死事地方捐建祠宇者均經核明例

案奏辦奉 旨允准各在案今該道擬由闔軍籌備經費在於平涼府城空地建修忠義祠宇以祀武威軍陣亡傷故文武員弁勇丁人等並附祀隨同打仗陣亡官紳核與成案相符應懇 天恩俯准飭部立案以垂永久入祠之文武員弁兵勇官紳銜姓花名清冊容俟查造呈齋至日分送各部查照下該部知之○庚午夏至大祀 地於 方澤遣載敦恭代行禮○辛未召崇厚入覲以岐元兼署奉天將軍○乙亥諭前因京師錢價漲落不定錢店多有關閉於民間生計殊有關係諭令步軍統領等衙門嚴拏私鑄妄爲彈壓茲據步軍統領衙門奏稱近因私鑄攪雜街市挑剔小錢致錢價無定錢店關閉者不少現將藉端滋擾搶奪之人犯及有意牟利潛逃之奸商拏獲數起擬先行枷號押赴各街示衆再行按律治罪以儆效尤至私鑄人犯現已拏獲數案送部訊辦日來市肆漸次安帖等語仍著該衙門督飭員弁隨時妥籌整頓毋任奸商藉端罔利致累閭閻並仍嚴拏私鑄人犯以重國法○丙子閭敬銘等奏請將順天等府賑務展至八月停止允之○丁丑諭御史鄧慶麟奏參光祿寺署丞敬惠攬權營私各款當派賀壽慈恩承秉公查辦茲據查明敬惠被參撥借款目等節或遵照例章辦理或有案可循或已回堂或未遺失尙無攬權營私積壓剋扣各情弊惟於應放油行銀兩因當日傳領未到以後並不認真催領輒以纂辦則例率行具稿借用且稱係已放未領之款情近挪移雖未動支而從前朦混之咎究無可辭其另加

平餘一節雖爲辦公之用亦非始自該員惟經手動支並不立案辦理殊屬草率敬惠著卽撤去一切差使交部議處卽著該衙門將加扣平餘一項詳細查核如可裁減卽行改歸舊章尙必須藉資辦公亦應妥議章程務昭核實其所短銅器三千餘件應如何勒限賠繳並以後派帶印鑰如何添派同辦或幫辦人員以杜專擅之處一併奏明辦理○是月美利堅國使臣西華回國參贊何天爵署理○比利時國使臣謝惠施回國謝武伯署理

六月庚辰諭前任都統奕山由侍衛出師回疆等處荷累朝知遇之恩洊升將軍都統補授御前大臣內大臣因年逾八旬蒙恩准其開缺仍留一等鎮國將軍賞食全俸方冀遐齡克享恩眷長承茲聞溘逝殊深軫惜加恩著賞給陀羅經被派員勒載漚帶領侍衛十員卽日前往奠醊賞銀一千兩經理喪事由廣儲司給發並照例賜卹任內一切處分悉予開復應得卹典該衙門察例具奏伊曾孫頭品廕生毓照著賞給郎中應封宗室毓楷著賞給主事用示篤念耆臣至意○壬午直隸按察使黎兆棠以病免○以丁壽昌爲直隸按察使○崇厚岐元恩福奏承准宗人府咨稱會同戶部議覆給事中李宏謨原奏奉天地方新加整頓東溝通溝各邊境開荒裕稅之計漸蕃擬請仿照嘉慶年間移居宗室成案於秦省新徵邊稅內籌款俾資養贍惟一時給地建房暨應備賞需能否於荒稅內多籌餘款藉資經費並以後移居各

宗室常年養贍能否於荒稅內酌量提撥應由奴才崇厚岐元恩福體察情形妥議具奏奉 旨依議欽此欽遵咨行前來 奴才等查該給事中所奏原爲仰體 皇仁培植宗支起見但有款項可籌自應遵照辦理惟奉省俸餉向係仰給他省接濟近因欠解纍纍左支右絀卽東邊外之東溝通溝各處現經設官分治就地升科其額徵錢糧並各項邊稅歲入無幾以邊外所出供邊外所需尙須力求撙節勢難再籌他項以爲挹注之資 奴才等詳加體察在京宗室一時難以遽議移居而在奉舊居並原移居宗室生齒日繁邇來有志上進者頗不乏人現擬另行籌款於原設兩宗學外添設義學凡宗室有願讀書者均准入學肄業惟旣導其向學之心若不寬以登進之路其才堪造就者仍不免置散投閒難求上進舊例奉省宗室雖有考取學生揀補宗室正副管長並准進京考選侍衛筆帖式與京學肄業宗室一體錄用之條而正副管長恆數十年始出一缺且赴京考選又苦於資斧爲難遂多中阻查京都各部司員均有宗室專缺從前奉省宗室人數無多所以 盛京五部並未設有宗室司員現舊居宗室已有一千二百餘人移居宗室已有一百七十餘人今昔情形旣不相同僅有宗室堂主事二缺升途未免過隘若不酌量變通則限於升途卽難期奮勉將何以資觀感而育人材 奴才等查 盛京五部並將軍衙門所屬其額設筆帖式一百三十餘缺五部共設郎中十三缺員外郎二十四缺主事二十三缺現經公同商酌若由

滿洲筆帖式內撥出六缺京選主事內撥出兩缺京選員外郎內撥出兩缺京選郎中內撥出一缺作爲宗室專缺在 盛京宗室中可開升途而於本處題選無關與京旗選缺各員亦分缺有限擬請卽於

盛京五部額設較多之刑部京選郎中三缺員外郎五缺主事六缺戶部京選員外郎五缺主事五缺內以刑部京選郎中一缺員外郎一缺主事一缺戶部京選員外郎一缺主事一缺改爲 盛京宗室題升題補之缺再於將軍衙門及五部滿洲筆帖式內各以一缺作爲本處宗室考取補用之缺除發發遣移居宗室本身不計外餘則讀書及歲者均准與官學生按照考試舊章一體考試滿漢文藝由筆帖式遞升主事員外郎中其未經升補之先仍由吏部照舊選補似此變通較爲簡易惟此項改設之缺原欲培養人才嗣後凡遇缺出應請專用考班人員以勵讀書上進仰副 朝廷作育宗室之至意如蒙 俞允其應如何定缺題選計俸升補各章程相應請 旨飭下宗人府吏部核議施行 上諭崇厚等奏遵

查奉省情形在京宗室難以再議移居著卽毋庸辦理至所請將舊居及原移居宗室變通升途一節著宗人府會同吏部議奏○李鴻章奏前福建巡撫丁日昌春間請假在籍 臣因晉豫奇災賑欸無措稔知該前撫 臣素以救民爲心又熟悉南中紳富呼應最靈函請力疾就地勸捐助濟該前撫 臣接信後義形於色召集潮州香港一帶紳董竭誠勸募驟獲巨欸各董事捐戶先索札諭實收爲憑該前撫 臣雖養病

閒居自以受 恩深重時勢艱難不得不權宜緩急奏明刊刻關防印發實收俾昭大信昨接該前撫臣揭陽函稱前後經手籌勸捐數除臺灣林維源等五十二萬元外潮州約三十萬元南洋香港新加坡小呂宋暹羅越南各埠十六萬元臺灣約七八萬元合計已逾百萬現仍廣爲勸助其任事之勇救災之誠卽此一端已爲人所難及惟旣蒙 恩開缺各處紳商或已書捐而未繳清或已領實收而未換照造冊頭緒紛煩亟須逐漸清理誠恐各捐戶聞知該撫臣業經開缺繳款不免遲延且距臣處太遠遇有專奏請獎事件未能及時核辦亦無以昭激勵擬請 旨准令該前撫臣於賑捐未竣之前仍專摺奏事俟捐務告竣再將前刻關防銷燬庶捐款可尅期繳解晉豫嗷嗷待哺之飢民稍有指望如蒙 俞允卽由臣咨行該前撫臣查照得 旨丁日昌賑捐事務准其專摺具奏○癸未諭左宗棠奏請將辦理糧運侵剋貪冒之參將革職訊辦等語提督銜記名總兵甘肅靈州營參將蕭兆元辦理包頭糧運局務經左宗棠飭令停採撤局乃竟任意遲延並不回營銷差經手各批軍糧多未運到並有侵蝕勒扣採買運脚等情弊急應澈底根究蕭兆元著先行革職歸案訊辦○甲申以載齡爲體仁閣大學士○曾國荃奏微臣待罪晉疆已逾一載上年四月履任卽值遍省奇荒本地錢糧既無涓滴之入而出款反較往歲爲增倉皇補苴朝不謀夕仰荷 皇太后 皇上如天之仁凡遇中外臣工爲民請命無不立予 恩施甚至臣下